

**Sumáriu Kazu****Tribunál Judisiál Primeira Instáncia Suai****Outubru 2024**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instáncia Suai**1. Totál kazu ne'ebé JSMP monitoriza : 21**

| Artigu | Tipu Kazu | Númeru |
|---|---|--------|
| Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD) | Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika | 7 |
| Artigu 179 KP | Abuzu seksuál ba ema ne'ebé labele reziste | 1 |
| Artigu 139 KP no artigu 2(nú.1(b), nú. 2(f)) no artigu 20(nú.1) hosi Lei Nú. 5/2017 | Omisídiu agravadu no arma brankas | 1 |
| Artigu 316 KP | Kontrabandu | 1 |
| Artigu 23 KP, artigu 172 KP no artigu 178 KP | Tentativa violasaun seksuál no aktu seksuál ho adoloxente | 1 |
| Artigu 177 KP no artigu 182 KP | Abuzu seksuál ba menór no agravasaun | 1 |
| Artigu 171 KP, artigu 181 KP no artigu 145 KP no artigu 2,3, 35 Lei Kontra Violénsia Doméstika (LKVD) | Koasaun seksuál ho ezibisionizmu seksuál no ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika | 1 |

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

| | | |
|--|---|-----------|
| Artigu 177 KP | Abuzu seksuál ba menór | 1 |
| Artigu 23 KP no artigu 292 KP | Tentativa korupsaun pasiva ba aktu ilísitu | 1 |
| Artigu 140 KP | Omisídiu neglijente | 1 |
| Artigu 171 KP | Koasaun seksuál | 1 |
| Artigu 177 KP no artigu artigu 2,3, 35 Lei Kontra Violénsia Doméstika (LKVD) | Abuzu seksuál ba menór ho natureza violénsia doméstika | 1 |
| Artigu 177 KP, artigu 182 KP no artigu 172 KP no artigu 173 KP no artigu 2,3, 35 Lei Kontra Violénsia Doméstika (LKVD) | Abuzu seksuál ba menór ho agravasaun no violasaun seksuál ho agravasaun ho natureza violénsia doméstika | 1 |
| Artigu 154 KP | Maus-tratus ba kónjuje | 1 |
| Artigu 183 KP | Devasa | 1 |
| Totál | | 21 |

2. Totál desizaun ne'ebé JSMP monitoriza: 19

| Tipu pena | Artigu | Númeru |
|-------------------------------------|----------------|-----------|
| Suspensaun ba prizaun nia ezekusaun | 68 KP | 5 |
| Pena admoestasaun | 82 KP | 1 |
| Pena multa | 67 KP | 6 |
| Pena prizaun | 66 KP | 5 |
| Absolve | | 1 |
| Omologa pedidu dezisténsia keixa | 226 nú (2) KPP | 1 |
| Totál | | 19 |

2. Totál kazu sira ne'ebé kontinua prosesu tuir JSMP nia monitorizasaun: 2

B. Deskrisaun sumáriu julgamentu ba desizaun kazu sira

1. Krime abuzu seksuál ba ema ne'ebé labele reziste

Nú. Prosesu : 0004/24.MFSIC
Kompozisaun Tribunál : Koletivu
Juis : Dra. Patricia Xavier Fatima, Dr. Hugo da Cruz Pui no
Dr. Naason Mário Armindo Marques Doutel
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun tinan 6

Iha 01 Outubru 2024, Tribunál Judisiól Primeira Instánsia Suai prezide leitura akordaun ba krime abuzu seksuál ba ema ne'ebé labele reziste, envolve arguidu DCS hasoru ofendida PM, iha Munisípiu Manufahi.

Akuzasaun Prokuradór

Prokuradór akuza katak iha 01 Marsu 2024, iha oras tuku 14:00 lokraik, ofendida kuru hela bee iha haris fatin, derepente arguidu hosi kotuk tama tuir ofendida ba iha haris fatin laran hodi hako'ak ofendida no buti ofendida nia ibun no obriga hasai ofendida nia roupa no arguidu mós hasai nia roupa hodi halo relasaun seksuál ho ofendida. Hafoin relasaun seksuál arguidu dehan ba lezada katak atu labele ko'alia sai ba família sira, kona-ba arguidu nia aktu ne'e no arguidu hatais nia roupa sai hosi haris fatin ba iha ninia uma. ofendida sente nia orgaun sensitivu moras tanba foin primeiravés halo relasaun seksuál no rezulta ofendida to'o dezmaia latan hela iha haris fatin laran ofendida nia inan ba haris fatin mak haree ofendida latan hela iha haris fatin laran no ofendida nia inan ba bolu vijiñu sira hodi ajuda kous ofendida ba iha uma no bainhira ofendida iha fali konsiensia (sadar) konta arguidu nia aktu ne'e ba ofendida ninia família, nune'e ofendida ho ninia família sira ba apresenta keixa iha eskuadra PNTL.

Prokuradór akuza arguidu kontra artigu 179 KP kona-ba abuzu seksuál ba ema ne'ebé labele reziste ho moldura penál tinan 4 to'o tinan 12.

Produsaun ba prova sira

Iha prosesu julgamentu, arguidu deklara katak halo duni relasaun seksuál ho ofendida maibé hakarak ho hakarak, arguidu deklara katak ofendida mak bolu atu ajuda dada mangeira ba haris fatin no derepente arguidu nia isin kose malu ho ofendida nune'e arguidu haku'ak tiha ofendida no hasai tiha ninia roupa no arguidu mós hasai nia roupa hodi halo relasaun seksuál ho ofendida, arguidu hatene katak ofendida ho kondisaun defisiénsia liman no ain ne'ebé mamar loos. Arguidu deklara liután katak momentu ne'eba ema la haree, arguidu deklara mós katak arrepende ninia hahalok no rekoñese ninia hahalok ne'e ladi'ak.

Iha parte seluk, ofendida kontinua konfirma faktu iha akuzasaun no deklara katak liman no ain ne'e desde moris mai defisiénsia ou mamar kedas to'o agora, ofendida deklara liután katak momentu arguidu buti kakorok no taka ibun no arguidu dehan atu halo relasaun seksuál maibé ofendida lahatan no nonook de'it no arguidu kontinua hasai roupa no hasai nia roupa depois latan ofendida ba rai mak halo relasaun seksuál hafoin relasaun seksuál ofendida dezmai tanba foin primeiravés halo relasaun seksuál no

ofendida nia inan mak ba haris fatin haree no fó hatene ba viziñu sira ba ajuda ofendida ba nia uma no hafoin ofendida ba apresenta keixa iha edifisiu PNTL.

Alegasaun finál

Prokuradór haktuir katak iha julgamentu arguidu konfesa parsialmente ba faktu iha akuzasaun katak halo relasaun seksuál ne'e ho konsentimentu, maibé ofendida kontinua konfirma faktu hotu iha akuzasaun, prokuradór konsidera arguidu nia aktu ne'e priense elementu krime, tanba ne'e husu ba tribunál atu kondena arguidu ho pena prizaun tinan neen.

Entretantu defeza haktuir katak iha julgamentu arguidu deklara de'it faktu ne'ebé nia komete, ofendida kontinua konfirma faktu iha akuzasaun, mezmu ofendida konfirma maibé defeza haree no analiza ba faktu katak arguidu ho ofendida halo relasaun seksuál ne'e ho konsentimentu no arguidu foin mak mai hatan iha tribunál arrepende ninia hahalok tanba ne'e husu ba tribunál atu aplika medida pena ne'ebé kmaan ba arguidu.

Desizaun

Depoisde avalia faktu hotu, tribunál kolektivu halo tiha alterasaun kualifikasaun hosi krime abuzu seksuál ba ema ne'ebé labele reziste ba fali violasaun seksuál ho agravasaun tanba ofendida deklara katak momentu ne'eba arguidu buti ofendida nia kakorok no taka ofendida niniaibun. Relasiona ho tribunál nia pedidu alterasaun ne'e prokuradór no defeza la halo opozisaun.

Depoisde avalia faktu hotu, tribunál prova katak arguidu tama tuir ofendida ba iha haris fatin laran buti ofendida nia kakorok no taka ofendida niaibun hodi kolu ofendida nia rounpa no halo relasaun seksuál ho ofendida.

Bazeia ba faktu provadu hirak ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan neen.

2. Krime omisídiu agravadu no arma brankas

| | |
|----------------------|--|
| Nú. Prosesu | : 0001/24.BBBBC |
| Kompozisaun Tribunál | : Kolektivu |
| Juis | : Dr. Naason Mário Armindo Marques Doutel, Dr. Hugo da Cruz Pui no Dra. Patricia Xavier Fatima |
| Prokuradór | : Dr. Simeão Brites Seixas |
| Defeza | : Dr. Domingos dos Santos no Dr. Escolastico da Costa Nunes Maia (Advogado Privadu) |
| Desizaun | : Pena prizaun tinan 4 |

Iha 03 Outubru 2024, Tribunál Judisiál Primeira Instánsia Suai Prezide leitura akordaun ba krime omisídiu agravadu no arma brankas ne'ebé envolve arguidu Luis da Silva Pires hasoru ofendidu Joanico Barreto (nu'udar maun), iha Munisípiu Bobonaro.

Akuzasaun Prokuradór

Prokuradór akuza katak iha 19 Feveireiru 2024, iha oras tuku 7:00 dadeer, arguidu hadeer mai haree hetan nia motorizada roda parte oin no kotuk hetan estragus, nune'e arguidu foti tudik iha nia uma laran hodi ba buka tuir ofendidu no hetan ofendidu tuur hela iha uma to'os nian. Bainhira ofendidu haree hetan arguidu, ofendidu lori ai-pedasuk halai hasoru arguidu hodi baku dala ida iha arguidu nia hasan parte karuk, hafoin arguidu lori tudik sona kedas dala ida iha ofendidu nia knosen, nune'e ofendidu halai no monu dook hosi fatin akontesimentu no konsege evakua ofendidu ba iha Óspital Referál Maliana no ikus mai ofendidu nia vida la salva (lakon vida).

Prokuradór akuza arguidu kontra artigu 139 KP kona-ba omisídiu agravadu ho moldura penál tinan 12 to'o tinan 25 no artigu 2(nú.1(b), nú. 2(f)) no artigu 20(nú.1) hosi Lei Nú. 5/2017.

Produsaun ba prova sira

Iha prosesu julgamentu, arguidu deklara katak momentu ne'eba iha dadeer ba kesi karau iha to'os, maibé derepente ofendidu hosi kotuk lori ai-pedasuk baku dala ida iha arguidu nia hasan parte karuk rezulta arguidu nia nehan musan ida monu no ofendidu kontinua atu baku tan arguidu, maibé arguidu satan netik ho liman, rezulta arguidu monu tun ba rai ofendidu tuur iha arguidu leten no kontinua hodi tuku arguidu no iha momentu ne'e arguidu haree hetan ofendidu sikat hela tudik iha ofendidu nia knosen, nune'e arguidu hasai tiha tudik hosi ofendidu nia knosen hodi sona kedas ofendidu, ofendidu konsege hamrik hodi halai no monu dook hosi fatin akontesimentu. Arguidu deklara liután katak momentu ofendidu baku primeiru ne'e arguidu hakilar no sira nia aman ajuda lori arguidu ba ospital no polisia mós lori ofendidu ba ospital, maibé labele salva ofendidu nia vida.

Alegasaun finál

Prokuradór haktuir katak iha kazu ne'e prokuradór akuza arguidu komete krime rua, krime omisídiu agravadu no krime arma brankas, iha julgamentu arguidu konfesa faktu hotu iha akuzasaun katak arguidu mak sona duni ofendidu, prova mós katak ofendidu mak baku uluk arguidu maibé arguidu nia aktu hasoru ofendidu ne'e la iminente, prokuradór entende katak arguidu nia aktu krime ne'e la priénse lejítima defeza tanba arguidu nia aktu ne'e superiór liu ofendidu halo hasoru arguidu, nune'e prokuradór husu ba tribunál atu kondena arguidu ba krime rua omisídiu agravadu kondena ho pena prizaun tinan 12 no ba krime arma brankas kondena arguidu ho pena prizaun tinan 4 no pena únika tinan 13.

Entretantu, defeza husu ba tribunál atu kondena arguidu tuir konviksaun tribunál nian.

Desizaun

Depoisde avalia faktu sira hotu, tribunál konsidera faktu iha akuzasaun ne'e provadu hotu, no konsidera mós deklarasaun arguidu nian provadu katak arguidu momentu ne'eba atu ba kesi karau iha to'os, derepente ofendidu ho ai-pedasuk ida no sikat tudik iha ofendidu nia knosen hodi baku dala ida iha arguidu nia hasan no rezulta arguidu nia nehan fuan ida monu no ofendidu baku tan dala ida maibé arguidu satan netik, rezulta

arguidu monu ba rai, ofendidu aproveita hodi tuur iha arguidu leten no kontinua tuku arguidu no arguidu hetan kona tudik sikat hela iha ofendidu nia knosen, nune'e arguidu foti tudik sona kedas dala iha ofendidu nia knotak. Tribunál konsidera arguidu nia aktu ne'e lejítima defeza, maibé la balansu tanba momentu ne'e ofendidu baku arguidu ho ai-pedasuk, maibé arguidu foti tudik iha ofendidu nia knotak sona kedas ofendidu.

Bazeia ba faktu provadu hirak ne'e no tetu mós ho sirkunstánsia atenuante hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan haat no absolve arguidu hosi krime arma brankas.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia ibun no tuku dala barak iha ofendida nia ulun. Tribunál prova katak aktu hirak ne'e rezulta ofendida sente moras no raan sai hosi inus.

Bazeia ba faktu provadu sira ne'e no tetu mós ho sirkunstánsia hot-hotu ne'ebé haleu krime ne'e, tribunál konklui prosesu ne'e no kondena arguidu ho pena multa US\$45.00. Pena ne'e arguidu sei selu US\$1.00 kada loron durante loron 45. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

3. Krime ofensa ba integridade fízika simples ho natureza violénsia doméstika

Nú. Prosesu : 0007/23.MFSIC
Kompozisaun Tribunál : Singulár
Juis : Dr. Naason Mário Armindo Marques Doutel Sarmiento
Prokuradór : Dr. Simeão Brites Seixas
Defeza : Dr. Domingos dos Santos
Desizaun : Pena Multa US\$60.00

Iha 03 Outubru 2024, Tribunál Judisiál Primeira Instánsia Suai prezide leitura sentensa ba krime ofensa ba integridade fízika simples ho natureza VD ne'ebé envolve arguidu AM hasoru nia feen BdCX, iha Munisípiu Manufahi.

Akuzasaun prokuradór

Prokuradór akuza katak iha 09 Dezembru 2023, iha oras tuku 09:30 dadeer, arguidu husu osan US\$1.50 ba iha ofendida atu sosa sigaru, maibé ofendida hatan katak "osan la iha", ho nune'e arguidu ho ofendida diskute malu ofendida soe tiha arguidu nia roupa ba iha rai, arguidu tuku dala rua iha ofendida nia inus no tuku dala ida iha ofendida nia ibun. Arguidu nia aktu ne'e, rezulta ofendida sofre moras no raan iha fatin agresaun.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 1 to'o tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende ninia hahalok, foin primeiravés mai hatan iha tribunál no deklara katak depoisde akontesimentu di'ak malu kedas no to'o ohin lora la iha tan problema seluk. Arguidu hanesan xefe aldeia kada fulan hetan subsidiu US\$150.00.

Depoisde rona deklarasaun hosi arguidu, prokuradór husu ba tribunál atu presinde tiha ofendida nia deklarasaun tanba arguidu konfesa faktu hotu iha akuzasaun, nune'e prova ne'ebé presiza suficiente ona. Relasiona ho pedidu ne'e, defeza konkorda ho prokuradór nia pedidu. Tribunál bazeia ba pedidu ne'e konklui hodi presinde ofendida nia deklarasaun.

Alegasaun finál

Prokuradór haktuir katak arguidu provadu komete krime ofensa ba integridade física simples ho natureza violénsia doméstika, alende ne'e kazu violénsia doméstika aas tebes, nune'e atu halo prevensaun ba krime refere husu ba tribunál atu kondena arguidu ho pena multa.

Entretantu, defeza haktuir katak iha julgamentu arguidu konfesa faktu hotu, arrepende ninia hahalok no foin primeiravés mai hatan iha tribunál no depoisde akontesimentu to'o agora la iha problema seluk, tanba ne'e husu ba tribunál atu kondena arguidu ho pena multa.

Desizaun

Depoisde avalia faktu sira hotu, tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia hot-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$60.00 ne'ebé kada lora arguidu sei selu US\$1.00 durante lora 60. Tribunál mós fiksa pena alternativa durante lora 40 prizaun, bainhira arguidu la kumpri pena multa refere.

4. Krime kontrabandu

| | |
|----------------------|---|
| Nú. Prosesu | : 0008/24.CVSLL |
| Kompozisaun Tribunál | : Koletivu |
| Juis | : Dra. Patricia Xavier Fatima, Dr. Hugo da Cruz Pui no Dr. Naason Mário Armindo Marques Doutel |
| Prokuradór | : Dr. Rafael Jerónimo Gusmão |
| Defeza | : Dr. Domingos dos Santos |
| Desizaun | : Pena multa US\$45.00 |

Iha 03 Outubru 2024, Tribunál Judisiál Primeira Instánsia Suai Prezide leitura akordaun ba krime kontrabandu ne'ebé envolve arguidu Mario Inacio hasoru Estadu RDTL, iha Munisípiu Covalima.

Akuzasaun Prokuradór

Prokuradór akuza katak iha 13 Marsu 2024, iha oras tuku 18:00 lokraik arguidu ba hasoru ema sidadaun Indonézia iha mota área Harewe Biseuk fronteira entre Timor-Leste ho Indonézia hodi sosa tabaku shag ho kuantidade bal 20, kada bal ida ho valor US\$6,50 sentavus ho totál osan hamutuk US\$130.00. Depoisde sosa tiha tabaku no lori ba iha estrada ninin área koitau, arguidu sente dukur no toba tiha derepente de'it Polísia UPF halo patrulamentu iha ne'eba no konsege hetan arguidu ho sasan tabaku shag, nune'e Polísia UPF halo kedas aprensaun ba objetu no lori kedas arguidu ba halo identifikasaun.

Prokuradór akuza arguidu kontra artigu 316 KP kona-ba krime kontrabandu ho moldura penal tinan 2 to'o tinan 6 ka multa.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arguidu foin mak primeiravés mai hatan iha tribunál, arrepende ninia hahalok no promete iha futuru sei lahatama sasan liu hosi dalan illegal.

Alegasaun finál

Prokuradór haktuir katak arguidu provadu komete krime kontrabandu no iha julgamentu arguidu konfesa faktu hotu iha akuzasaun, tanba ne'e husu ba tribunál atu kondena arguidu ho pena multa, enkuantu ba objetu aprendidu ne'e afavor ba estadu.

Alende ne'e, defeza haktuir katak konkorda ho prokuradór nia alegasaun atu kondena arguidu ho pena multa tuir arguidu nia kbiit.

Desizaun

Depoisde avalia faktu sira hotu, tribunál prova katak arguidu hatama tabaku liuhosi dalan ilegál no la selu taxa.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no promete sei lakomete tan krime hanesan iha futuru. Tanba ne'e tribunál konklui prosesu no ne'e no kondena arguidu ho pena multa US\$45.00 ne'ebé kada lora arguidu sei selu 0,50 sentavus durante lora 90. Tribunál mós fiksa pena alternativa durante lora 45 prizaun, bainhira arguidu la kumpri pena multa refere.

5. Krime tentativa violasaun seksuál ho aktu seksuál ho adolexente

Nú. Prosesu : 0012/21.ANMBS
Juis : Dr. Nasson Mario Armindo Marques Sarmento, Dr. Hugo da Cruz
Pui no Dr. Yudi Pamukas
Prokuradór : Dr. Simeão Brites Seixas
Defeza : Dr. Angelmo Pinto
Desizaun : Pena prizaun tinan 3 suspende ba tinan 4

Iha 09 Outubru 2024, Tribunál Judisiál Primeira Instáncia Suai, prezide leitura akordaun ba krime tentativa violasaun seksuál ho aktu seksuál ho adolexente envolve arguidu ZSR hasoru ofendida EJPQ, iha Munisípiu Ainaro.

Akuzasaun prokuradór

Prokuradór akuza katak iha 28 Outubru 2021, iha oras tuku 11:00 dadeer, ofendida ho nia kolega nain tolu la'ó ba eskola bainhira to'ó iha arguidu nia ofisina arguidu direktamente hakat ba kaer ofendida nia liman parte loos rasta ofendida tama ba iha ninia ofisina laran, ofendida ninia kolega na'in rua seluk ta'uk no halai kontinua ba eskola. Bainhira arguidu dada ofendida tama ba iha ofisina laran arguidu foti faru ida sena tama ba iha ofendida nia ibun atu labele hakilar, depois arguidu riba ofendida ba iha kama leten hodi hatete ba ofendida katak *"ita rua halo relasaun seksuál se la'e hau lori tudik sona mate tiha ó"*, tuir mai arguidu hanehan metin ofendida hodi hasai hotu ofendida nia rupa no tenta atu halo relasaun seksuál ho lezada, maibé la konsege halo relasaun seksuál, tanba derepente ofendida nia aman ki'ik rona ema hakilar iha ofisina laran, ho nune'e testemuña na'in rua loke ofisina nia odamatan tama ba haree hetan arguidu toba sae hela iha ofendida nia leten ho kondisaun la uza rupa no testemuña mós haree iha hena ne'ebé taka metin hela ofendida nia ibun. Ho nune'e halo arguidu hakfodak hader no lakonsege halo relasaun seksuál ho ofendida, arguidu mós sadik testemuña nain rua atu baku malu, maibé la konsege, tuir mai testemuña sira telefone kedas ba xefe suku hodi apresenta keixa. Kazu ne'e konsege rezolve tuir família no deside ofendida ho arguidu hola malu hanesan feen la'en, maibé moris hamutuk durante fulan ida de'it no halo relasaun seksuál dala ida de'it, depoide ne'e ofendida ho arguidu separa tiha.

Prokuradór akuza arguidu kontra artigu 23 KP kona-ba tentativa no artigu 172 KP kona-ba violasaun seksuál ho moldura penal tinan 5 to'ó tinan 15 no artigu 178 KP kona-ba aktu seksuál ho adolexente ho moldura penal to'ó tinan 5.

Produsaun ba prova sira

Iha prosesu julgamentu, arguidu deklara katak faktu balun loos no balun laloos, faktu ne'ebé loos mak rei de'it ofendida nia ibun, entretantu faktu kona-ba arguidu kolu ofendida nia rupa no tenta atu halo relasaun seksuál ho ofendida ne'e laloos, no ofendida ninia apa ki'ik toman arguidu ho ofendida iha ofisina laran ne'e mós laloos. Arguidu deklara tan katak depoide akontesimentu ne'e konsege rezolve ona problema ne'e no deside arguidu ho ofendida hola malu tiha no durante fulan ida hola malu ne'e halo relasaun seksuál dala ida, arguidu deklara liután katak ofendida ba vijita nia inan aman no la fila mai uma to'ó ohin loron. Arguidu deklara liután katak depoide sira separa ka fahe malu tiha mak foin sira apresenta keixa hasoru arguidu.

Iha parte seluk, ofendida kontinua konfirma faktu hotu iha akuzasaun no deklarata katak ofendida lakohi fila ona ba arguidu nia uma, tanba arguidu nia feton no aman haree ofendida la di'ak.

Testemuña SdR nu'udar ofendida nia kolega eskola depoimenta katak momentu ne'e la'o hamutuk ho lezada ba eskola, bainhira to'o iha arguidu nia ofisina oin arguidu dada maka'as ofendida nia liman halo ofendida sente ta'uk no halai kedas ba eskola.

Testemuña LT nu'udar ofendida nia aman ki'ik, depoimenta katak momentu ne'eba atu ba merkadu no to'o iha arguidu nia ofisina rona ema hakilar iha ofisina laran hanesan ahi mak soke, testemuña dudu maka'as odamatan ofisina no odamatan nakloke tiha haree hetan arguidu toba hela iha ofendida nia leten, tanba testemuña kaer toma sira rua no arguidu sadik testemuña atu baku malu maibe testemuña MA, mai haketak tiha sira no depois ida ne'e apresenta keixa ba iha xefe suku.

Testemuña MA nu'udar ofendida nia primu depoimentu katak momentu akontesimentu ne'e la'o hamutuk ho testemuña LT to'o iha ofisina refere rona ema hakilar, nune'e testemuña LT ba loka tiha odamatan tama ba ofisina refere no sira atu baku malu mak testemuña haketak tiha sira rua.

Alegasaun final

Prokurador haktuir katak, arguidu konfesa parsialmente ba faktu iha akuzasaun, mezmu nune'e ofendida kontinua konfirma faktu hotu iha akuzasaun no deklarata katak momentu ne'eba arguidu obriga dada ofendida nia liman ba ofisina laran no obriga atu halo relasaun seksuál maibe lakonsege, tanba testemunã toman no halo tiha impedimentu, bazeia ba faktu sira ne'ebe produs iha perante julgamentu ne'e husu ba tribunál atu kondena arguidu tuir konviksaun tribunál nian.

Entretantu, defeza haktuir katak bazeia ba faktu sira ne'ebe produs durante julgamentu defeza duvida, tanba ofendida deklarata katak iha akontesimentu ne'e arguidu sena faru kaos ba ofendida nia ibun, maibe testemuña depoimenta katak ofendida hakilar mak foin sira loka odamatan, serage sena faru ba ofendida nia ibun nia bele hakilar, defeza hanoin katak la lojika bainhira faru taka metin hela ofendida nia ibun maibe bele hakilar, tanba ne'e husu ba tribunál tetu didi'ak hodi decide tuir konviksaun tribunál nian.

Desizaun

Depoisde avalia faktu sira hotu, tribunál konsidera faktu kona-ba tentativa violasaun seksuál provadu hotu, tanba momentu ne'eba arguidu dada ofendida ba iha nia ofisina laran no obriga ofendida atu halo relasaun seksuál, maibe tanba testemuña sira tama ba ofisina laran hodi nune'e, arguidu la konsege halo relasaun seksuál ho ofendida. Entretantu faktu kona-ba aktu seksuál ho adolexente tribunál konsidera la provadu tanba ofendida ho arguidu feen laen.

Bazeia ba faktu provadu sira ne'e no tetu mós ho sirkunstánsia hotu ne'ebé haleu krime ne'e, nune'e tribunál konklui prosesu ne'e hodi kondena arguidu ba krime tentativa violasaun seksuál ho pena prizaun tinan tolu suspende ba tinan haat, entretantu ba krime aktu seksuál ho adolexente tribunál absolve arguidu hosi krime ne'e.

6. Krime ofensa ba integridade fízika simples ho natureza violénsia doméstika

Nú. Prosesu : 0007/23.MFFBL
Kompozisaun Tribunál : Koletivu
Juis : Dra. Patricia de Araujo F. B. M. Xavier
Prokuradór : Dr. Nelson J.S Magno
Defeza : Dr. Domingos dos Santos
Desizaun : Pena multa US\$ 45.00

Iha 10 Outubru 2024, Tribunál Judisiál Primeira Instánsia Suai prezide leitura sentensa ba krime ofensa ba integridade fízika simples ho natureza VD ne'ebé envolve arguidu AFN hasoru nia feen, iha Munisípiu Manufahi.

Akuzasaun prokuradór

Prokuradór akuza katak iha 10 Novembru 2023, iha oras tuku 09:00 dadeer, arguidu tuku dala ida iha ofendida nia kabaas parte loos no riba ofendida ba iha kama leten. Antes agreasaun ne'e arguidu haruka ofendida atu hamaus sira nia oan ne'ebé tanis hela, maibé ofendida lakohi, nune'e arguidu halo agreasaun hirak ne'e hasoru ofendida.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 1 to'o tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa totál ba faktu iha akuzasaun no deklarasaun katak arrepende ninia hahalok, baku feen ne'e ladi'ak no depoisde akontese to'o agora la iha tan problema seluk, arguidu hanesan karpinteiru ho rendimentu kada fulan bele hetan osan to'o US\$500.00.

Depoisde rona deklarasaun hosi arguidu, prokuradór husu ba tribunál atu presinde tiha ofendida nia deklarasaun tanba arguidu konfesa faktu hotu iha akuzasaun, nune'e prova ne'ebé prezisa suficiente ona. Relasiona ho pedidu ne'e, defeza konkorda ho prokuradór nia pedidu. Tribunál bazeia ba pedidu ne'e konklui hodi presinde ofendida nia deklarasaun.

Alegasaun finál

Prokuradór konsidera arguidu provadu komete krime hasoru ofendida, bazeia ba konfisaun arguidu nian no haree mós ba krime violénsia doméstika ne'ebé aas tebes, tanba ne'e husu ba tribunál atu kondena arguidu tuir konviksaun tribunál nian.

Entretantu, defeza haktuir katak iha julgamentu arguidu konfesa ba faktu hotu iha akuzasaun, arrepende ninia hahalok no rekoñese baku feen ne'e ladi'ak, nune'e husu ba tribunál atu kondena arguidu ho pena multa.

Desizaun

Depoisde avalia faktu hotu, tribunál prova katak arguidu tuku dala ida iha ofendida nia kabaas parte loos no riba ofendida ba iha kama leten.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok no rekonése baku feen ne'e ladi'ak, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0.50 sentavus kada lora durante lora 90. Tribunál mós fiksa pena alternativa durante lora 45 prizaun, bainhira arguidu la selu pena multa refere.

7. Krime ofensa ba integridade física simples ho natureza violénsia doméstika

Nú. Prosesu : 0004/24.CVMCT
Kompozisaun Tribunál : Singulár
Juis : Dra. Patricia de Araujo F. B. M. Xavier
Prokuradór : Dr. Simeão Brites Seixas
Defeza : Dr. Domingos dos Santos
Desizaun : Pena multa US\$ 45.00

Iha 14 Outubru 2024, Tribunál Judisiál Primeira Instánsia Suai prizide julgamentu leitura sentensa ba krime ofensa ba integridade física simples ho natureza VD ne'ebé envolve arguidu AFdC hasoru nia feen, iha Munisípiu Covalima.

Akuzasaun prokuradór

Prokuradór akuza katak iha 02 Abril 2024, iha oras tuku 22:00 kalan, arguidu tebe dala rua iha ofendida nia knosen parte karuk no tuku dala rua iha matan parte karuk kauza bubu no metan. Antes ne'e arguidu ho kondisaun lanu sein motivu ne'ebé klaru halo agresaun hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 1 to'o tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu arguidu konfesa faktu hotu iha akuzasaun no deklarata katak arrepende ninia hahalok katak baku feen ne'e ladi'ak, husu deskulpa ona ba ofendida, foin primeiravés mai hatan iha tribunál no depoisde akontesimentu liu semana tolu mak di'ak malu fali ho ofendida, agora nafatin hela hamutuk iha uma ida hanesan feen ho la'en.

Depoisde rona deklarasaun hosi arguidu, prokuradór husu ba tribunál atu presinde tiha ofendida nia deklarasaun tanba arguidu konfesa faktu hotu iha akuzasaun, nune'e prova ne'ebé prezisa suficiente ona. Relasiona ho pedidu ne'e, defeza konkorda ho prokuradór nia pedidu. Tribunál bazeia ba pedidu ne'e konklui hodi presinde ofendida nia deklarasaun.

Alegasaun finál

Prokuradór haktuir katak arguidu konfesa faktu hotu iha akuzasaun, mezmu depoisde akontesimentu ne'e arguidu labaku ona ofendida, maibé arguidu nia aktu ne'ebé komete hasoru lezada priense elementu krime tuir artigu 145 KP no Lei Kontra Violénsia Doméstika, tanba ne'e husu ba tribunál atu kondena arguidu ho pena multa.

Alende ne'e, defeza mós konkorda ho alegasaun prokuradór nian atu kondena arguidu ho pena multa tuir arguidu nia kondisaun.

Desizaun

Depoisde avalia faktu hotu, tribunál prova katak arguidu tebe dala rua iha ofendida nia knosen parte karuk no tuku dala rua iha matan parte karuk kauza bubu no metan.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0.50 sentavus kada loron durante loron 90. Tribunál mós fiksa pena alternativa durante loron 45 prizaun, bainhira arguidu la kumpri pena multa refere.

8. Krime ofensa ba integridade física simples ho natureza violénsia doméstika

| | |
|----------------------|---|
| Nú. Prosesu | : 0027/24.CVSUI |
| Kompozisaun Tribunál | : Singulár |
| Juis | : Dra. Patricia de Araujo F. B. M. Xavier |
| Prokuradór | : Dr. Simeão Brites Seixas |
| Defeza | : Dr. Domingos dos Santos |
| Desizaun | : Pena multa US\$45.00 |

Iha 14 Outubru 2024, Tribunál Judisiál Primeira Instánsia Suai prizide julgamentu leitura sentensa ba krime ofensa ba integridade física simples ho natureza VD ne'ebé envolve arguidu FdS hasoru nia feen JC, iha Munisípiu Covalima.

Akuzasaun Prokuradór

Prokuradór akuza katak iha 09 Abril 2024, iha oras tuku 07:00 dadeer, arguidu kaer ofendida nia fuuk rasta ba rai depois foti ai-sanak baku dala tolu iha ofendida nia isin loloon tomak. Antes ne'e, arguidu haruka ofendida halo kafe maibé tanba ofendida la halo, nune'e arguidu ho ofendida diskute malu to'o mosu agresoun ne'e hasoru ofendida.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 1 to'o tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu arguidu konfesa faktu hotu iha akuzasaun no deklarata katak depoisde akontesimentu liu oras balu di'ak malu kedas no husu kedas deskulpa ba ofendida, arguidu deklarata foin primeiravés mai hatan iha tribunál no hanesan ema agrikultór la iha rendimentu fiksi kada fulan.

Depoisde rona deklarasaun hosi arguidu, prokuradór husu ba tribunál atu presinde tiha ofendida nia deklarasaun tanba arguidu konfesa faktu hotu iha akuzasaun, nune'e prova ne'ebé presiza suficiente ona. Relasiona ho pedidu ne'e, defeza konkorda ho prokuradór nia pedidu. Tribunál bazeia ba pedidu ne'e konklui hodi presinde ofendida nia deklarasaun.

Alegasaun finál

Prokuradór haktuir katak arguidu provadu komete krime hasoru ofendida, bazeia ba konfisaun arguidu nian no prokuradór konsidera katak kazu violénsia doméstika ne'e aas, tanba ne'e atu prevensaun ba krime refere husu ba tribunál atu kondena arguidu ho pena multa.

Entretantu defeza haktuir katak arguidu arrepende ninia hahalok, depoisde akontesimentu to'o agora la iha tan problema seluk, arguidu foin primeiravés mai hatan iha tribunál, tanba ne'e husu ba tribunál kondena arguidu ho pena ne'ebé kmaan.

Desizaun

Depoisde avalia faktu hotu, tribunál prova katak arguidu kaer ofendida nia fuuk rasta ba rai depois foti ai-sanak baku dala tolu iha ofendida nia isin loloon tomak.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho ofendida no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0.50 sentavus kada loran durante loran 90. Tribunál mós fiksa pena alternativa durante loran 45 prizaun, bainhira arguidu la selu pena multa refere.

9. Krime abuzu seksuál ba menór ho agravaun

Nú. Prosesu : 0004/20.MFALS
Kompozisaun Tribunál : Koletivu
Juis : Dr. Naason Mario Armindo Marques Doutel, Dr. Hugo da Cruz Pui no Dra. Patricia de Araujo F. B. M. Xavier
Prokuradór : Dr. Nelson J.S Magno
Defeza : Dr. Albano Maia
Desizaun : Absolve

Iha 14 Outubru 2024, Tribunál Judisiál Primeira Instánsia Suai prezide leitura akordaun ba krime abuzu seksuál ba menór ho agravausaun ne'ebé envolve arguidu OP hasoru Ofendida ho idade (tinan 10), iha Munisípiu Manufahi.

Akuzasaun prokuradór

Prokuradór akuza katak iha 11 Agostu 2020, iha oras tuku 8:00 dadeer, arguidu bolu ofendida hodi hamos arguidu nia eskritóriu ne'ebé foer, bainhira ofendida hamós hela eskritóriu laran, arguidu husu ofendida kona-ba nia inan aman hela iha ne'ebé no husu ofendida nia tinan hira, hafoin arguidu hakat besik ba ofendida hodi kaer metin ofendida nia orgaun sensitivu, nune'e ofendida baku ses tiha arguidu nia liman, arguidu sente la di'ak sai tiha ba liur, liu tiha minitu balun arguidu tama fali ba eskritóriu laran kontinua husu ofendida kona-ba nia naran no arguidu kontinua kaer ofendida nia ulun no kaer ofendida nia orgaun sensitivu, maibé ofendida kontinua baku ses tiha arguidu nia liman hodi tanis no halai sai hosi eskritóriu ba informa kedas ba nia kolega sira no ofendida fila ba uma no hatete ba nia aman katak arguidu kaer ofendida nia orgaun sensitivu dala rua. Konsekuensia hosi arguidu nia aktu ne'e halo ofendida sente trauma no sente la seguru atu kontinua ba eskola.

Prokuradór akuza arguidu kontra artigu 177 KP kona-ba abuzu seksuál ba menór ho moldura penál tinan 5 to'o tinan 20 no artigu 182 KP nú 1, a no b kona-ba agravausaun.

Produsaun ba prova sira

Iha prosesu julgamentu, arguidu deklara katak iha akontesimentu tanba arguidu nia gabinete foer, nune'e arguidu bolu ofendida atu hamós no bainhira ofendida hamos hela fatin refere foer kona ofendida nia ulun, faru no saia parte oin, nune'e arguidu hamós tiha, maibé arguidu la kaer ofendida nia orgaun sensitivu. Arguidu deklara tan katak iha meiodia ofendida nia aman ba eskola hodi husu arguidu kona-ba arguidu kaer ofendida nia orgaun sensitivu, maibé arguidu dehan ba ofendida nia aman katak arguidu la kaer ofendida nia orgaun sensitivu. Arguidu deklara liután katak de poisde akontesimentu ne'e ministériu edukasaun suspende tiha arguidu durante fulan haat no de poisde remata suspensaun arguidu kontinua hanorin maibé kargu hanesan kordenadór ne'e fó fali ba ema seluk. Arguidu deklara tan katak hamós foer iha ofendida nia parte oin ne'e la iha intensaun atu kaer ofendida nia orgaun sensitivu, maibé tanba foer ne'e mak hamós, arguidu foin primeiravés mai hatan iha tribunál.

Iha parte seluk ofendida deklara katak momentu ne'eba halimar hela ho nia kolega sira, arguidu bolu atu ba hamós nia gabinete, nune'e ofendida hatan katak "*hau hemu bé hotu mak ba hamós,*" hemu tiha bé hotu ofendida bolu nia kolega na'in tolu tan maibé

arguidu haruka ofendida nia kolega nain tolu ne'e fila tiha no ofendida mesak mak ba hamós, bainhira ofendida hamós hela foer arguidu husu kona-ba ofendida nia inan aman, ofendida nia tinan no klase hira. Ofendida deklarata tan katak momentu ne'e dasa foer iha armari leten no foer tun mai kona ofendida nia fuuk no faru oin no saia mós foer hotu, nune'e arguidu hamos tiha foer ne'ebé iha ofendida nia fuuk, faru oin no saia no ofendida mós deklarata katak arguidu la kaer ofendida nia orgaun sensitivu.

Alegasaun finál

Prokuradór haktuir katak iha prosesu ne'e arguidu iha indisiu ba krime abuzu seksuál ba menór, maibé iha julgamentu arguidu konfesa parsialmente katak la buti ofendida nia orgaun sensitivu, maibé ofendida nia faru no saia mak foer kona nune'e arguidu hamós tiha, alende ne'e ofendida mós deklarata katak arguidu bolu ba hamós arguidu nia gabinete no ofendida nia faru no saia foer mak arguidu hamós no arguidu la buti ofendida nia orgaun sensitivu, ho deklarasaun arguidu ho ofendida nian nune'e prokuradór husu ba tribunál atu deside tuir konviksaun tribunál nian.

Entretantu defeza haktuir katak iha julgamentu arguidu deklarata katak la kaer ofendida nia orgaun sensitivu, maibé tanba foer ne'ebé mak ofendida dasa hosi armari leten kona ofendida nia ulun no saia oin foer nune'e arguidu hanesan aman ida hamós tiha foer iha ofendida nia ulun no saia maibé laos ho intensaun atu kaer ofendida nia orgaun sensitivu, ofendida mós deklarata katak arguidu la kaer ofendida nia orgaun sensitivu maibé ba hamós de'it, defeza haree katak aktu arguidu nian ne'e la priense elementu krime nune'e husu ba tribunál atu absolve arguidu hosi krime refere.

Desizaun

Depoisde avalia faktu hotu ne'ebé produs durante julgamentu, tribunál konsidera faktu ne'ebé akuza ba arguidu ne'e la priense elementu hosi krime ne'ebé akuza ba arguidu, tanba iha produsaun ba prova arguidu deklarata katak ofendida dasa foer mak foer kona ofendida nia faru oin no arguidu hamós de'it ofendida nia faru no saia ne'ebé foer no ofendida mós deklarata katak arguidu hamós de'it foer iha ofendida nia rupa parte oin la kaer ofendida nia orgaun seksuál. Bazeia ba faktu la provadu ne'e tribunál konklui prosesu ne'e no absolve arguidu hosi krime refere.

10. Krime koasaun seksuál, ezibisionizmu seksuál no ofensa ba integridade fízika simples ho natureza violénsia doméstika

| | |
|----------------------|---|
| Nú. Prosesu | : 0059/24.BBMLV |
| Kompozisaun Tribunál | : Koletivu |
| Juis | : Dra. Patricia de Araujo F. B. M. Xavier, Dr. Naason Mário Armando Marques Doutel Sarmiento no Yudi Pamucas |
| Prokuradór | : Dr. Nelson J.S Magno |
| Defeza | : Dr. Domingos dos Santos |
| Desizaun | : Pena prizaun tinan 6 |

Iha 14 Outubru 2024, Tribunál Judisiál Primeira Instánsia Suai prezide leitura akordaun ba krime koasaun seksuál, ezibisionizmu seksuál no ofensa ba integridade fízika simples ho natureza VD ne'ebé envolve arguidu DM hasoru nia oan, iha Munisípiu Bobonaro.

Akuzasaun Prokuradór

Prokuradór akuza katak iha loron no fulan ne'ebé la apura, maibé iha tinan 2020, ofendida ho nia alin toba hela iha sira ninia kuartu, arguidu tama ba lamas ofendida nia susun halo ofendida hakfodak no hader haree arguidu hamrik besik hela kama sorin, ofendida tanis hodi konta ba nia alin ne'ebé toba ho ofendida sira rua hakuak malu no tanis.

Iha dadeer ofendida hader no husu arguidu nune'e *"apa nusa halo ida ne'e mai hau, maibé arguidu hatan dehan ó lalika dehan ba ó nia ama tanba hau sei la halo tan."* Iha loron tuir mai ofendida fó hatene ba nia inan no ofendida nia inan husu kedas arguidu maibé arguidu nonook de'it no ofendida nia inan la husu tan tanba ta'uk sira nia uma laran sai la di'ak.

Tuir mai iha loron no fulan la apura maibé iha tinan 2023, ofendida iha hela nia kuartu arguidu tama ba husu ofendida atu kaer arguidu nia orgaun sensitivu, maibé ofendida la halo tuir no informa kedas ba nia inan.

iha 07 Marsu 2024, iha oras tuku 12:00 meiodia, ofendida atu tama ba uma laran liu hosi odamatan parte kotuk maibé arguidu hamrik iha odamatan oin hodi hatudu nia orgaun sensitivu ba ofendida no halo ofendida ta'uk no halai sai ba iha nia tiu sira nia uma. Liu loron rua ofendida la fila ba uma, arguidu tuir ofendida ba iha ofendida nia tiu nia uma hodi bolu ofendida fila ba uma, maibé ofendida lakohi fila, ho nune'e arguidu rakut ofendida nia fuuk, tuku dala ida iha ulun no rasta ho obriga ofendida nia liman atu sae motor maibé ofendida nafatin lakohi, nune'e arguidu tuku tan dala haat iha ofendida nia ulun no arguidu fila fali ba uma. Konsekuenseia hosi arguidu nia aktu ne'e rezulta ofendida sente moe no moras iha fatin agresaun.

Prokuradór akuza arguidu kontra artigu 171 KP kona-ba koasaun seksuál ho moldura penal tinan 2 to'o tinan 8 no artigu 181 KP kona-ba ezibisionizmu seksuál ho moldura penal tinan 3 ka multa no artigu 145 KP kona-ba ofensa ba integridade fízika simples ho moldura penal tinan 3 ka multa, konjuga ho artigu konjuga ho artigu 2, 3 (a), 35 (b) no 36 LKVD.

Produsaun ba prova sira

Antes tama ba produsaun ba prova bazeia ba artigu 262 KPP nú 1, tribunál halo tentativa konsiliausaun ba krime ezibisionizmu seksuál. Iha tentativa konsiliausaun ne'e ofendida hakarak dada fali nia keixa kona-ba krime ezibisionizmu seksuál ho kondisaun ida katak arguidu labebe repete tan ninia hahalok ida ne'e hasoru nia oan sira no ema seluk, arguidu mós simu ofendida nia pedidu ida ne'e no husu deskulpa kedas ba ofendida. Prokuradór no defeza husu atu omologa pedidu ofendida nian no tribunál omologa akordu ne'e no absolve arguidu hosi krime ne'e no kontinua halo julgamentu ba krime rua seluk.

Iha prosesu julgamentu arguidu konfesa faktu sira iha akuzasaun no deklarata katak hahalok ne'e ladi'ak hasoru nia oan, arguidu deklarata katak promete sei la repete ninia hahalok no foin primeiravés mai hatan iha tribunál.

Alende ne'e ofendida kontinua konfirma faktu sira iha akuzasaun no deklarata katak perdua arguidu ninia hahalok no husu arguidu atu labele repete tan ninia hahalok hasoru nia oan sira no ema seluk, ofendida mós deklarata katak lakohi arguidu tama prizaun.

Iha julgamentu ne'e testemuña hanesan arguidu nia feen no oan hili direitu nonook.

Alegasaun finál

Prokuradór haktuir katak iha julgamentu ne'e arguidu konfesa faktu sira hotu iha akuzasaun no konfirma mós hosi ofendida, prokuradór haree katak arguidu nia aktu krime ne'e priense elementu krime hotu, tanba ne'e husu ba tribunál atu kondena arguidu ho pena prizaun.

Entretantu, defeza haktuir katak arguidu arrepende ninia hahalok, foin mak mai hatan iha tribunál no ofendida perdua arguidu no lakohi arguidu tama prizaun, ho razaun sira ne'e husu ba tribunál atu aplika pena suspensaun ba arguidu.

Desizaun

Depoisde avalia faktu sira hotu, tribunál prova katak arguidu komete aktu krime koasaun seksuál ho agravausaun no ofensa ba integridade física simples ho natureza violénsia doméstika hasoru ofendida, ne'ebé arguidu rasik konfesa faktu sira iha akuzasaun no konfirma hosi lezada.

Bazeia ba faktu provadu sira ne'e no tetu mós ho sirkunstásia hotu-hotu ne'ebé haleu krime ne'e, nune'e tribunál konklui prosesu no kondena arguidu ho pena prizaun tinan neen.

11. Krime abuzu seksuál ba menór

Nú. Prosesu : 0005/22.ANMBS
Kompozisaun Tribunál : Koletivu
Juis : Dr. Hugo da Cruz Pui, Dr. Naason Mário Armindo
Marques Doutel no Yudi Pamukas
Prokuradór : Dr. Nelson J.S Magno
Defeza : Dr. Angelmo pinto
Desizaun : Pena prizaun tinan 10

Iha 16 Outubru 2024, Tribunál Judisiól Primeira Instánsia Suai Prezide leitura akordaun ba krime abuzu seksuál ba menór envolve arguidu LdC hasoru ofendida ho idade (tinan 13), iha Munisípiu Ainaro.

Akuzasaun Prokuradór

Prokuradór akuza katak iha loron no fulan ne'ebé la apura maibé iha tinan 2020, momentu ne'eba ofendida fila hosi eskola no tein hela iha dapur laran, arguidu tama ba dapur laran hatete ba ofendida katak *“atu moris hamutuk ka halo relasaun seksuál ho ofendida maibé ofendida rejeita”*, arguidu obriga kaer ofendida nia liman loos hodi rasta ba iha kuartu laran hasai hotu ofendida nia roupa no arguidu mós hasai hotu nia roupa hodi halo relasaun seksuál ho ofendida.

Iha iha loron no fulan ne'ebé la apura maibé iha tinan 2020 no iha fulan Novembru 2021, ofendida ho arguidu halo relasaun seksuál kada semana dala ida to'o ofendida grávida isin rua.

Iha 01 Jullu 2022, iha oras tuku 17:00 lokraik, iha kafe laran ofendida sente kanotak moras atu partus, ofendida ba tiha kafe laran partus tiha oan mane ida no soe tiha bebe mane ne'e ba mota laran no to'o agora lahatene bebe nia paradeiru.

Prokuradór akuza arguidu kontra artigu 177 KP kona-ba abuzu seksuál ba menór ho moldura penal tinan 5 to'o 20 no artigu 182 KP kona-ba agravaun.

Produsaun ba prova sira

Iha prosesu julgamentu, arguidu nega faktu hotu iha akuzasaun no deklarata katak nunka halo relasaun seksuál ho ofendida tanba ofendida hanesan nia alin rasik, arguidu deklarata tan katak foin mak mai hatan iha tribunál.

Alende ne'e, ofendida kontinua konfirma faktu sira iha akuzasaun no deklarata katak nunka halo relasaun seksuál ho mane seluk no foin primeiravéz halo relasaun seksuál ho arguidu sente moras no raan sai barak, momentu ofendida isin rua ta'uk fó hatene ba inan aman tanba arguidu nu'udar ofendida nia maun rasik, ta'uk inan aman baku ka oho sira rua.

Alegasaun finál

Prokuradór haktuir katak mezmu iha julgamentu arguidu nega katak nunka halo relasaun seksuál ho ofendida, maibé rona fali ofendida kontinua konfirma faktu sira iha

akuzasaun, prokuradór haree katak arguidu nia aktu krime ne'e priense hotu tuir artigu 177 KPP nia, nune'e husu ba tribunál atu kondena arguidu ho pena prizaun.

Entretantu defeza husu ba tribunál atu kondena arguidu tuir konviksaun tribunál nian.

Desizaun

Depoisde avalia faktu sira hotu, tribunál prova katak arguidu halo abuzu seksuál hasoru ofendida mezmu iha julgamentu arguidu nega faktu hotu iha akuzasaun maibé ofendida konfirma faktu hotu iha akuzasaun.

Bazeia ba faktu provadu sira ne'e no tetu mós sirkuntánsia sira hotu ne'ebé haleu krime ne'e, nune'e tribunál konklui prosesu no kondena arguidu ho pena prizaun tinan sanulu.

12. Krime tentativa korupsaun pasiva ba aktu ilísitu

Nú. Prosesu : 0082/21.PDSUA
Kompozisaun Tribunál : Koletivu
Juis : Dr. Hugo da Cruz Pui, Dr. Naason Mário Armindo
Marques Doutel no Yudi Pamukas
Prokuradór : Dr. Nelson J.S Magno
Defeza : Dr. Jonas Henrique da Costa
Desizaun : Pena prizaun tinan 3 suspende ba tinan 3

Iha 16 Outubru 2024, Tribunál Judisiál Primeira Instánsia Suai Prezide leitura akordaun ba krime korupsaun pasiva ba aktu ilísitu ne'ebé envolve arguidu Agustinho Maia hasoru estadu RDTL, iha Munisípiu Covalima.

Akuzasaun prokuradór

Prokuradór akuza katak iha 28 Agostu 2021, iha oras tuku 14:00 meiodia, testemuña ba asiste jogu bingo iha Aldeia Kuloan, hafoin asiste tiha jogu refere maizumenus iha oras tuku 16:30 lokraik, testemuña fila ba uma ho motorizada marka Mio Beat, kor mutin ho sapa matrikula M. 1103 tula mós ho nia kolega maibé la uza kapasete derepente hasoru polísia na'in haat ho kareta patrolamentu nian hodi taka kedas dalan, hafoin arguidu ho membru Polísia tun ba husu testemuña hodi dehan "*atu ba ne'ebé*", testemuña hatan katak "*atu ba ninia uma no hau nia uma mak ne'eba ne'e*", arguidu husu dokumentu motorizada nian no karta kondusaun, testemuña hatan dehan iha, maibé arguidu hatan dehan imi la uza kapasete no lori motor ba Eskuadra Zumalai pois lokraik mak imi la'o tuir ba.

Tuir mai iha oras tuku 17:00 lokraik, testemuña akompaña hosi nia primu ba iha Eskuadra Polisia Zumalai nian ho objetivu atu foti nia motorizada maibé to'o iha sala vizita, arguidu Agustinho Maia bolu kedas testemuña, maibé testemuña la preokupa hodi ba hasoru arguidu iha edifisiu nia kotuk no arguidu husu kedas ba testemuña atu fó osan US\$20.00, testemuña hatan katak osan la iha. Tanba la iha resposta pozitivu arguidu dehan la iha buat ida, ami hakerek tiketi prende motorizada nian hodi ba selu iha Banku ema ida selu US\$60.00 no ba ema na'in rua la uza kapasete ho valor US\$120.00. hafoin arguidu lori testemuña ba hasoru ajente SdC iha eskuadra laran

hodi hakerek tiketi prende motorizada atu selu iha banku tanba lori motor la uza kapasete, nune'e testemuña simu tiha tiketi ho nia primu Virsimo fila tiha ba uma.

Iha 30 Agostu 2021, iha oras tuku 08:00 dadeer, testemuña ba iha Komandu PNTL Munisípiu Covalima no hasoru malu ho komandante tranjitu Sr. Patricio de Jesus, testemuña hatudu tiketi prende motorizada nian ba komandante tranjitu no polísia hakerek invoice no fó testemuña atu ba selu iha banku BNU ho valor US\$30.00 tuir lei Kódigu Estrada nian.

Bainhira testemuña ba selu tiha banku fila kedas ba polísia Eskuadra Zumalai atu foti nia motor no hatudu auto infrasaun ba komandante Antonio Soares atu foti nia morizada, maibé komandante ne'e husu fali testemuña, se mak hakerek surat ne'e, testemuña hatan dehan komandante tranjitu mak hakerek rona nune'e, komandante Antonio Soares dehan ida ne'e labele, ita tenke selu US\$60.00 depois foti fali invoice ne'e fó fali ba testemuña no haruka testemuña ba hasoru tranjitu atu selu fali US\$60.00. Testemuña fila mai hasoru komandante tranjitu atu selu fali maibé komandante esplika ba nia katak lei la fó dalan atu haruka selu koima dala rua, no haruka testemuña ba apresenta keixa iha Ministériu Públiku.

Prokuradór akuza arguidu kontra artigu 23 KP kona-ba tentativa no artigu 292 KP kona-ba korupsaun pasiva ba aktu ilisitu ho moldura penal tinan 3 to'o tinan 15.

Produsaun ba prova sira

Iha prosesu julgamentu, arguidu deklara katak momentu halo patrulamentu ne'e hasoru testemuña ho motorizada la uza kapasete nune'e lori tiha motorizada refere ba iha eskuadra no haruka arguidu tuir ba eskuadra, arguidu deklara katak momentu ne'eba komandante mak haruka husu osan US\$20.00 iha testemuña maibé testemuña dehan osan la iha nune'e haruka testemuña ba hasoru ajente santina hodi hakerek invoice haruka arguidu ba selu iha banku, arguidu deklara tan katak depoisde ida ne'e la iha ona kuñesimentu tanba testemuña rasik hasoru komandante Antonio Soares.

Testemuña iha ninia deklarasaun deklara katak momentu ne'eba arguidu husu duni osan maibé testemuña hakarak fó invoice para ba selu iha banku lakohi fó osan ba arguidu nune'e polísia sira hakerek invoice haruka atu ba selu iha banku no mai iha komandu munisípiu hasoru komandante tranjitu no hakerek invoice ba selu iha banku no foti nota selu hatudu ba komandante no komandante la konkorda ho testemuña selu US\$30.00 de'it nune'e haruka testemuña ba selu tan no testemuña ba hasoru fali komandante tranjitu maibé komandante tranjitu dehan labele aplika koima dala rua ba testemuña no komandante haruka testemuña apresenta keixa hasoru arguidu no testemuña apresenta keixa hasoru arguidu.

Alegasaun finál

Prokuradór haktuir katak iha julgamentu arguidu deklara katak tenta husu osan ba iha testemuña maibé tanba testemuña mak hatan dehan osan la iha no la fó, prokuradór entende katak arguidu nia aktu ne'e priense faktu iha akuzasaun tanba ne'e husu ba tribunál atu kondena arguidu.

Entretantu defeza haktuirk katak iha julgamentu arguidu deklara momentu ne'eba komandante mak haruka arguidu atu husu osan ba iha testemuña no arguidu husu duni osan maibé testemuña la fó osan no arguidu haruka testemuña ba hasoru ajente Santina hodi prepara tiketi prenda ba testemuña ba selu iha banku, depoisde ida ne'e arguidu la iha kuñesimentu, defeza husu ba tribunál atu analiza didi'ak hafoin kondena arguidu.

Desizaun

Depoisde avalia faktu hotu, tribunál prova katak arguidu komete aktu tentativa korupsaun pasiva ba aktu ilisitu arguidu husu osan iha testemuña, arguidu konfesa no konfirma mós hosi testemuña.

Bazeia ba faktu provadu ne'e no tetu sirkuntánsia atenuante hanesan arguidu konfesa, foin mak mai hatan iha tribunál, nune'e tribunál konklui prosesu no kondena arguidu ho pena prizaun tinan tolu suspende ba tinan tolu.

13. Krime ofensa ba integridade fízika simples ho natureza violénsia doméstika

Nú. Prosesu : 0074.23.PDSUA
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Rafael Jerónimo Gusmão
Defeza : Dr. Jonas Henrique da Costa
Desizaun : Pena prizaun fulan 9 suspende ba tinan 1

Iha 17 Outubru 2024, Tribunál Judisiál Primeira Instánsia Suai prezide leitura sentensa ba krime ofensa ba integridade fízika simples ho natureza VD ne'ebé envolve arguidu SOF hasoru nia feen JG, iha Munisípiu Manufahi.

Akuzasaun Prokuradór

Prokuradór akuza katak iha 07 Abril 2022, iha oras tuku 16:30 lokraik, arguidu tuku dala ida iha ofendida nia matan fukun parte loos, silu ofendida nia liman karuk ba kotuk, hafoin tuku dala ida iha ofendida niaibun rezulta moras no bubu. Antes agresaun ne'e, arguidu ho ofendida diskute malu kona-ba arguidu deskonfia ofendida amante ho mane seluk no arguidu husu ofendida nia telefone maibé ofendida la fó, nune'e mosu agreasaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira iha akuzasaun ne'e la loos hotu, arguidu ho ofendida moris separa ne'e la iha motivu ruma no momentu ne'eba arguidu tenta atu moris hamutuk fali ho ofendida, maibe ofendida mak lakohi ona. Arguidu mos deklara katak foin mak mai hatan iha tribunál.

Iha parte seluk, ofendida kontinua konfirma faktu sira iha akuzasaun no deklara katak motivu hosi fahe malu ne'e tanba momentu ne'eba depoisde arguidu halo tiha agresaun hasoru ofendida, ofendida fila tiha ba ninia distritu to'o agora ofendida la fila ba arguidu, tanba ofendida lakohi ona atu moris hamutuk ho arguidu.

Alegasaun finál

Prokuradór haktuir katak mezmu iha julgamentu arguidu nega faktu sira iha akuzasaun maibe ofendida kontinua konfirma faktu iha akuzasaun, prokuradór hanoin katak atu prevene krime violénsia doméstika iha sosiedade ida atu labele akontese tan krime refere, husu ba tribunál kondena arguidu tuir konviksaun tribunál nian.

Entretantu, defeza haktuir katak iha julgamentu arguidu deklara katak la baku ofendida maibe rona fali deklarasaun ofendida nian katak arguidu baku ofendida, defeza haree katak deklarasaun ne'ebé produs iha julgamentu ne'e halo defeza duvida tanba ne'e husu ba tribunál atu decide tuir konviksaun tribunál nian.

Desizaun

Depoisde avalia faktu sira hotu, tribunál prova katak arguidu tuku dala ida iha ofendida nia matan fukun parte loos, silu ofendida nia liman karuk ba kotuk no tuku dala ida iha ofendida niaibun rezulta moras no bubu.

Bazeia ba faktu provadu sira ne'e no tetu mos ho sirkunstásia hotu-hotu ne'ebé haleu krime, nune'e tribunál konklui prosesu no kondena arguidu ho pena prizaun fulan sia suspende ba tian ida.

14. Krime ofensa ba integridade fízika simples ho natureza violénsia doméstika

| | |
|----------------------|----------------------------|
| Nú.Prosesu | : 0005/24.CVFHR |
| Kompozisaun Tribunál | : Singulár |
| Juis | : Dr. Hugo da Cruz Pui |
| Prokuradór | : Dr. Simeão Brites Seixas |
| Defeza | : Dr. Angelmo Pinto |
| Desizaun | : Pena admoestasaun |

Iha 17 Outubru 2024, Tribunál Judisiál Primeira Instánsia Suai prizide leiura sentensa ba krime ofensa ba integridade fízika simples ho natureza VD ne'ebé envolve arguidu WAM hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha 19 Feveireiru 2024, iha oras tuku 19:00 kalan, arguidu basa dala ida iha ofendida nia hasan parte karuk no buti ofendida nia kakorok riba ofendida ba armari rezulta moras maka'as iha fatin agresaun. Antes ne'e ofendida ho arguidu diskute malu kona-ba ofendida teste eskrita serbisu ba Australia nian, maibé arguidu lakohi ofendida ba teste eskrita refere, nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

Produsaun ba prova sira

Iha prosesu julgamentu arguidu konfesa faktu sira sein rejerva, arguidu deklara baku feen ne'e ladi'ak, foin mak mai hatan iha tribunál no depoisde akontesimentu husu ona deskulpa ba ofendida.

Alende ne'e ofendida kontinua konfirma faktu sira hotu iha akuzasaun, ofendida deklara katak depoisde akontesimentu arguidu husu ona deskulpa no ofendida mós simu no perdua ona arguidu. Ofendida deklara tan katak to'o agora arguidu la repete ona ninia hahalok.

Alegasaun finál

Prokuradór haktuir katak arguidu provadu no presidente tuir faktu iha akuzasaun prokuradór nian ne'ebé arguidu konfesa no konfirma hosi ofendida, mezmú arguidu ho ofendida di'ak malu ona, maibé arguidu nia aktu krime ne'e priense element hosi krime ne'ebé akuza ba arguidu, tanba ne'e husu ba tribunál atu kondena arguidu ho pena multa.

Entretantu defeza haktuir katak iha perante julgamentu arguidu konfesa faktu sira iha akuzasaun no arguidu foin mak mai hatan iha tribunál, arrepende ninia hahalok no husu ona deskulpa ba ofendida no ofendida mós perdua ona arguidu, tanba ne'e husu ba tribunál kondena arguidu ho pena admoestasaun.

Desizaun

Depoisde avalia faktu sira hotu, tribunál prova katak arguidu komete aktu krime hasoru ofendida ne'ebé arguidu konfesa no konfirma hosi ofendida.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok no promete iha futuru sei lakomete

tan krime hasoru ofendida, nune'e tribunál konklui prosesu no kondena arguidu ho pena admoestasaun.

15. Krime ofensa ba integridade fizika simples ho natureza violénsia doméstika

Nù. Prosesu : 0038/23.ANANV
Kompozisaun Tribunál : Singulár
Juis : Dr. Hugo da Cruz Pui
Prokurador : Dr. Simeao Brites Seixas
Defeza : Dr. Angelmo Pinto
Desizaun : Pena multa US\$ 60.00

Iha 17 Outubru 2024, Tribunál Judisiál Primeira Instánsia Suai prezide leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu RdJ hasoru nia feen, iha Munisípiu Ainaro.

Akuzasaun Prokuradór

Prokuradór akuza katak iha 23 Novembru 2023, iha oras tuku 09:20 dadeer, arguidu foti ai-farina kain baku dala barak iha ofendida nia isin lolon no tebe dala rua iha kelen parte karuk rezulta moras no fitar. Antes ne'e arguidu deskonfia ofendida amante ho mane seluk, nune'e arguidu ho ofendida diskute malu no arguidu halo agresaun hasoru ofendida.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál tinan 1 to'ó tinan 3 ka multa konjuga ho artigu 2, 3 (c), 35 (b) no 36 LKVD.

Produsaun ba prova sira

Iha prosesu julgamentu arguidu konfesa faktu sira iha akuzasaun, arguidu deklara katak foin mak mai hatan iha tribunál, arrepende ninia hahalok no depoisde akontesimentu to'ó agora la iha problema seluk. Arguidu hanesan ema negosiante ne'ebé ho rendimentu ne'ebé la fiksi.

Depoisde rona deklarasaun hosi arguidu, prokuradór husu ba tribunál atu presinde tiha ofendida nia deklarasaun tanba arguidu konfesa faktu hotu iha akuzasaun, nune'e prova ne'ebé presiza suficiente ona. Relasiona ho pedidu ne'e, defeza konkorda ho prokuradór nia pedidu. Tribunál bazeia ba pedidu ne'e konklui hodi presinde ofendida nia deklarasaun.

Alegasaun finál

Prokuradór haktuir katak arguidu konfesa faktu sira hotu, arrepende ninia hahalok no depoisde akontesimentu la iha problema seluk, maibé arguidu nia aktu krime ne'e tenke hetan kondensasaun, tanba ne'e husu ba tribunál kondena arguidu ho pena multa.

Entretantu, defeza husu ba tribunál bazeia ba sirkunstánsia atenuante sira arguidu nian no husu ba tribunál atu decide tuir konviksaun tribunál nian.

Desizaun

Depoisde avalia faktu sira hotu, tribunál prova katak arguidu foti ai-farina kain baku dala barak iha ofendida nia isin lolon no tebe dala rua iha ofendida nia kelen parte karuk rezulta moras no fitar.

Bazeia ba faktu provadu sira ne'e no tetu mós ho sirkunstánsia hot-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$60.00 ne'ebé kada loron arguidu sei selu US\$1.00 durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

16. Krime omisidui negligente no kondusaun sein karta

Nú. Prosesu : 0007/24.CVZML
Kompozisaun Tribunál : Singulár
Juis : Dra. Patricia de Araujo F. B. M. Xavier
Prokuradór : Dr. Simeão Brites Seixas
Defeza : Dr. Jonas Henrique da Costa
Desizaun : Pena prizaun fulan 6 suspende ba fulan 6

Iha 18 Outubru 2024, Tribunál Judisiál Primeira Instánsia Suai prezide leitura sentensa ba krime omisidui negligente no kondusaun sein karta ne'ebé envolve arguida Edis Tein Aida Sequera Tilman Amaral hasoru ofendidu Brismos de Jesus, iha Munisípiu Covalima.

Akuzasaun Prokuradór

Prokuradór akuza katak iha 11 Abril 2024, iha oras ne'ebé la apura, arguida konduz motorizada ho marka Honda Verja kor mean ho sapa matrikula 0538 GA, hosi direisaun Zumalai ba Suai Villa kuandu to'o iha auto Estrada área tazilin nian arguida halai ho velocidade maka'as no laharee ofendida ho testemuña ne'ebé ultrapasa ba sira nia to'os hodi soke ofendida. Depoisde soke tiha ofendidu ba halo tratamentu iha Sentru Saúde Zumalai, tanba kondisaun grave, nune'e abulansia kontinua transporta ofendidu ba iha Ospital Referrál Suai no lori liu ofendidu ba HNGV maibé la konsege salva ofendidu nia vida.

Prokuradór akuza arguida kontra artigu 140 KP kona-ba omisidui negligente ho moldura penal tinan 4 ka multa no artigu 207 KP kona-ba kondusaun sein karta ho moldura penal tinan 2 ka multa.

Produsaun ba prova sira

Iha prosesu julgamentu, arguida konfesa faktu hotu iha akuzasaun, arguida deklara katak momentu ne'e ofendidu nia funebre ne'e arguida ho nia família kontribui fos karon

10, karau 2 mean ida metan ida, kafe ho masi midar no apoiu halo rate no hola kaisaun, gastu ba sasan hirak ne'e ho total osan hamutuk US\$1,985.00. Arguidu deklara tan katak desde sei SMP lori ona motor, arguida la iha karta kondusaun.

Testemuña Manuel de Jesus hanesan ofendidu nia aman depoimenta katak sasan hirak ne'e arguida ho nia familia sira mai apoiu ba ofendidu nia funebre, testemuña deklara katak depoisde akontesimentu iha liur nunka hirus malu ho arguidu ho nia familia sira di'ak malu hela, tanba sei iha relasaun familia uma lisan ida.

Alegasaun final

Prokurador haktuir katak depoisde leitura akuzasaun arguida konfesa no konfirma hosi testemuña, arguida hanesan funsionariu Guarda Floresta nian iha kuñesimentu maibe la iha intensaun trata nia karta kondusaun, tanba ne'e husu ba tribunál atu kondena arguida ho pena suspensaun.

Entretantu defeza haktuir katak iha julgamentu ne'e arguida konfesa faktu hotu no foin mak mai hatan iha tribunál ba krime ida ne'e, nune'e husu ba tribunál aplika pena ne'ebé adekuada ba arguida.

Desizaun

Depoisde avalia faktu hotu tribunál prova katak arguida konduz motorizada soke ofendidu to'o halakon vida no arguida mos la iha karta kondusaun.

Bazeia ba faktu provadu hirak ne'e no tetu mos ho sirkunstasia atenuante no agravante sira ne'ebé haleu krime ne'e, nune'e tribunál konklui prosesu ne'e no kondena arguida ho pena prizaun fulan neen suspende ba fulan neen.

17. Krime koasaun seksuál

| | |
|----------------------|---|
| Nú. Prosesu | : 0007/24.ANANV |
| Kompozisaun Tribunál | : Koletivu |
| Juis | : Dr. Samuel da Costa Pacheco, Dr. Hugo da Cruz Pui no Dr. Naasson Mário Armindo Marques Doutel Sarmento |
| Prokurador | : Dr. Rafael Jerónimo Gusmão |
| Defeza | : Dr. Domingos dos Santos |
| Desizaun | : Pena prizaun tinan 1 suspende ba tinan 1 |

Iha 18 Outubru 2024, Tribunál Judisiál Primeira Instánsia Suai Prezide leitura akordaun ba krime koasaun seksuál ne'ebé envolve arguidu TM hasoru ofendida OA, iha Munisípiu Ainaro.

Akuzasaun Prokurador

Prokuradór akuza katak iha 22 Janeiru 2024, iha oras tuku 12:00 meiodia arguidu konduz motorizada to'o iha ofendida nia uma oin arguidu para tiha motor no arguidu tama ba ofendida nia uma no taka tiha odamatan, ofendida sente ta'uk no hakfodak maibé arguidu bolu ofendida atu ba tuur iha arguidu nia sorin no arguidu kaer tiha ofendida nia liman no rein ofendida nia hasan parte karuk, ofendida sente ta'uk sai hosi uma ba fali dapur laran, arguidu tama tuir ba dapur laran no taka dapur nia odamatan no dehan ba ofendida atu toba maibé ofendida foti tiha arguidu nia telefone sai ba liur hodi hakilar husu ajuda ba vijiñu sira rona ofendida hakilar husu ajuda, arguidu mós halai maibé ofendida nia katuas oan rona sae ba uma no duni tuir arguidu no hodi kaer toman arguidu. Konsekuensia hosi arguidu nia hahalok ne'e ofendida sente ta'uk no trauma.

Prokuradór akuza arguidu kontra artigu 171 KP kona-ba koasaun seksuál ho moldura penál tinan 2 to'o tinan 8.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arguidu deklara katak iha akontesimentu ne'e arguidu ho kondisaun lanu no lahatene aan, arguidu deklara tan katak ba kazu ne'e dame malu ona no fó sala ona ba ofendida ho osan US\$500.00 no tais rua tais fetu ida no tais mane ida, arguidu deklara liután katak la amante ho ofendida, arguidu deklara foin mak mai hatan iha tribunál.

Alende ne'e ofendida kontinua konfirma faktu iha akuzasaun no deklara katak ba kazu ne'e dame malu ona no ofendida perdua ona arguidu ninia hahalok.

Alegasaun finál

Prokuradór haktuir katak arguidu konfesa faktu iha akuzasaun katak momentu ne'eba rein ofendida nia hasan ne'ebé ofendida rasik lakohi, alende ne'e ofendida mós konfirma faktu iha akuzasaun, prokuradór haree arguidu nia aktu ne'e priense artigu 171 KP nian, tanba ne'e husu ba tribunál atu kondena arguidu ho pena prizaun tinan rua suspende ba tinan tolu.

Entretantu defeza haktuir katak arguidu konfesa no foin mak mai hatan iha tribunál, parte seluk arguidu ho ofendida dame malu ona no arguidu fó sala ofendida ho osan US\$500.00 no tais rua tais fetu ida no tais mane ida, tanba ne'e bazeia ba sirkunstásia atenuante estra ordináriu husu ba tribunál fó pena kmaan ba arguidu.

Desizaun

Depoizde avalia faktu hotu, tribunál prova katak arguidu komete aktu krime koasaun seksuál hasoru ofendida ne'ebé arguidu konfesa no konfirma hosi ofendida.

Bazeia ba faktu provadu hirak ne'e no tetu mós ho sirkunstásia atenuante extra ordinariu katak arguidu ho ofendida dame malu ona no arguidu fó sala ona ofendida ho osan valor US\$500.00 tais rua tais fetu no tais mane, nune'e tribunál konklui prosesu no kondena arguidu ho pena prizaun tinan ida suspende ba tinan ida.

18. Krime abuzu seksuál ba menór ho natureza violénsia doméstika

Nú. Prosesu : 0016/20.CVZML
Kompozisaun Tribunál : Koletivu
Juis : Dr. Naason Mario Armindo Marques Doutel, Dr. Hugo da Cruz Pui no Dra. Patricia de Araujo F. B. M. Xavier
Prokuradór : Dr. Simeão Brites Seixas
Defeza : Dr. Jonas Henrique da Costa
Desizaun : Pena prizaun tinan 11

Iha 29 Outubru 2024, Tribunál Judisiál Primeira Instánsia Suai prezide leitura akordaun ba krime abuzu seksuál ba menór ho natureza violénsia doméstika ne'ebé envolve arguidu CdC hasoru oan entiada JLDNB ho idade (tinan 13), iha Munisípiu Covalima.

Akuzasaun Prokuradór

Prokuradór akuza katak iha 02 Novembru 2019, iha oras ne'ebé la apura iha kalan, ofendida ho nia alin han hotu tiha sei haree hela televizaun iha uma laran, ofendida nia alin na'in rua toba dukur ofendida taka tiha televizaun hodi lori nia alin na'in rua ba kuartu sira nia inan no aman nian hodi toba, lakleur arguidu mós loke odamatan tama ba kuartu laran toba hamutuk ho ofendida no nia alin sira iha kama ida, arguidu toba iha kama ninin toba besik ofendida, iha madrugada manu kokorek arguidu lamas ofendida nia oragaun sensitivu hosi liur depois hatama liman ba kalsa laran hodi buti halimar ofendida nia orgaun sensitivu no buti halimar ofendida nia susun ho maka'as, hafoin dadeer arguidu hader hodi ba liu natar.

Tuir mai iha 04 Novembru 2019, iha oras ne'ebé la apura maibé iha dadeer, ofendida ho nia alin sei toba hela iha sira nia kuartu laran ne'ebé taka de'it ho kurtina, arguidu tama ba laran buti halimar ofendida nia susun hafoin arguidu finji fanu ofendida nia alin na'in rua, ho akontesimentu ne'e ofendida lahatete sai ba nia inan tanba ta'uk. Bainhira ofendida nia inan ba kuda haree iha natar laran, ofendida sente rai manas ba toba tiha iha hadak leten iha uma ki'ik oan iha has hun iha uma sorin, lakeur arguidu mosu ba hodi toba de'it iha ofendida nia sorin, maibé bainhira ofendida book aan atu hadeer mak arguidu finji tau liman ba ofendida nia hirus matan no hit sae ofendida nia faru hodi kaer buti halimar ofendida nia susun no supa halimar.

iha altura ne'e ema lao ba mai iha dalan nune'e arguidu la seguru no husik tiha ofendida no ba tuur iha kadeira no ofendida mós halai tama ba uma laran hodi tanis maibé arguidu bolu fali ofendida haruka atu ba hola sigaru iha kioske.

Depoide akontesimentu iha leten ne'e arguidu abitua bebeik ona bainhira ba fanu ofendida sepre buti halimar ofendida nia susun.

Tuir mai iha 10 Juñu 2020, iha oras ne'ebé la apura maibé iha kalan, arguidu diskute malu tanba de'it haree fini ne'ebé uluk foti iha vijíñu sira no arguidu tolok nia feen ho liafuan mal no dehan ba nia feen katak "*hau hakarak hola labarik kiik*", hafoin duni nia feen no foti rounpa sai hosi uma, ho situaun hirak ne'e ofendida sente triste no tanis hodi dehan ba nia inan dehan "*ama soe malu de'it ona, apa ne'e ladi'ak loro-loron nia*

kaer hela de'it hau no bok bebeik ona hau", hafoin ofendida halai sai hosi uma ba kedas iha avo sira nia uma, bainhira ofendida to'o iha nia avo sira nia uma no informa kedas ba nia avo no nia tia katak arguidu kaer nia susun no orgaun sensitivu, no iha loron tuir mai ofendida hamutuk ho nia inan no tiu sira ba apresenta keixa iha polisia Zumalai. Konsekunensia hosi arguidu nia hahalok rezulta ofendida sente moe, ta'uk, triste no trauma.

Prokuradór akuza arguidu kontra artigu 177 Nú.2 KP kona-ba abuzu seksuál ba menór ho moldura penal tinan 5 to'o tinan 15, konjuga ho artigu 2 (b), 3 (c) no artigu 35 (b) LKVD.

Produsaun ba prova sira

Iha prosesu julgamentu, arguidu deklara katak faktu balun loos no faktu balun la loos, arguidu deklara katak hola malu ho ofendida nia inan no kuñese ofendida hanesan oan tanba hola ofendida nia inan ne'e ofendida foin fulan neen, arguidu deklara katak momentu ne'eba kalan nonton hela no ofendida nia alin toba nune'e arguidu kous hatoba iha kuartu laran no arguidu mós toba hamutuk ho nia oan na'in tolu toba iha kama ida, arguidu deklara liután katak ofendida toba besik parede oan na'in rua toba klaran no arguidu toba iha kama ninin, arguidu deklara katak kalan ne'e la kaer ofendida nia orgaun sensitivu no la lamas ofendida nia susun. Arguidu deklara liután katak nunka buti ofendida nia orgaun sensitivu no susun tanba ofendida hanesan nia oan, arguidu deklara liután katak iha 10 Juñu 2020, ne'e hirus malu ho ofendida nia inan no nervoju nune'e tolok duni hanesan iha akuzasaun.

Alende ne'e ofendida kontinua konfirma faktu sira iha akuzasaun no deklara katak sente triste, tanba desde inan soe malu ho aman rasik no arguidu rasik mak tau matan desde sei tinan ida to'o boot mak arguidu halo hahalok ida ne'e hasoru fali nia oan. ofendida deklara tan katak momentu ne'e nunka fó hatene ba nia inan tanba ta'uk inan baku fali ka hirus malu fali ho arguidu no momentu arguidu hirus malu ho ofendida nian inan no tolok nia inan ne'e mak ofendida ba konta hahalok arguidu nian ne'e ba ofendida ninia avo no tiu sira.

Testemuña EB hanesan ofendida nia inan no arguidu nia feen lakoi fó nia depoimentu.

Testemuña IB, hanesan ofendida nia inan boot depoimenta katak momentu ne'eba la iha kuñesimentu ba kazu ida ne'e, maibé ofendida nia inan rasik telefone hodi akompaña ofendida atu ba apresenta keixa.

Testemuña CB hanesan ofendida nia avo, depoimenta katak momentu ne'eba ofendida halai ba iha testemuña nia uma no hatete sai dehan arguidu book ofendida kaer orgaun sensitivu no susun, testemuña depoimenta tan katak hafoin dadeer akompaña ofendida ba apresenta keixa iha eskuadra PNTL.

Alegasaun finál

Prokuradór haktuir katak hafoin leitura akuzasaun arguidu nega faktu sira iha akuzasaun maibé rona ofendida kontinua konfirma faktu sira iha akuzasaun no reforsa

hosi testemuña sira, prokuradór hanoin katak arguidu nia aktu krime ne'e priense elementu krime hotu, tanba ne'e husu ba tribunál atu aplika pena efetiva ba arguidu.

Entretantu, defeza haktuir katak iha perante julgamentu arguidu deklara katak nunka kaer ofendida nia orgaun sensitivu, maibé rona fali ofendida konfirma faktu sira hotu no reforsa hosi testemuña, bazeia ba deklarasaun sira ne'ebé produs durante julgamentu, nune'e husu ba tribunál atu deside tuir konviksaun tribunál nian.

Desizaun

Depoisde avalia faktu sira hotu, tribunál prova katak arguidu nia aktu ne'e priense elementu krime abuzu seksuál ba menór tuir artigu 177 KP Nú.2 KP, mezmu iha julgamentu arguidu nega faktu sira iha akuzasaun maibé ofendida kontinua konfirma faktu iha akuzasaun.

Bazeia ba faktu prova sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan sanulu resin ida.

19. Krime devasa

Nú. Prosesu : 0052/23.ANANV
Kompozisaun Tribunál : Singulár
Juis : Dra. Patricia de Araujo F. B. M. Xavier
Prokuradór : Dr. Rafael Jeronimo Gusmão
Defeza : Dr. Domingos dos Santos (AP)
Desizaun : Omologa pedidu dezisténsia keixa

Iha 28 Outubru 2024, Tribunál Judisiál Primeira Instánsia Suai prezide julgamentu tentativa konsiliaun ba krime devasa ne'ebé envolve arguidu FdRR hasoru ofendida JdC, iha Munisípiu Ainaro.

Akuzasaun Prokuradór

Prokuradór akuza katak iha 01 Dezembru 2023, iha oras ne'ebé la apura, arguidu utiliza ID Facebook ho naran CP hodi publika ofendida ninia imagem ho kondisaun isin molik. Media ain kanek. Argudu nia aktu ne'e ofendida sente moe bainhira ba eskola haree nia kolega sira.

Prokuradór akuza arguidu kontra artigu 183 KP kona-ba devasa ho moldura penal tinan 1 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun ba kazu krime sira ho natureza semi-públiku, nune'e antes tama ba julgamentu produsaun ba prova sira, juis

husu halo tentativa konsiliaun. Iha prosesu tentativa konsiliaun ne'e, ofendida hakarak deziste ninia keixa hasoru arguidu ho kondisaun katak arguidu tenke hamós hotu ofendida nia foto sira iha arguidu nia telefone, arguidu mós simu ofendida ninia peididu no pruntu hamós ofendida nia foto, alende ne'e arguidu husu kedas deskulpa ba ofendida.

Alegasaun finál

Prokuradór no defeza konkorda ho parte rua nia akordu ne'e no husu ba tribunál atu omologa prosesu ne'e.

Desizaun

Bazeia ba akordu hosi parte sira no pedidu dezisténsia hosi arguidu no ofendida, tribunál konklui prosesu ne'e no omologa pedidu dezisténsia hosi ofendida no absolve arguidu hosi krime refere.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>